

Yakuba

Kuma Kan Men ye Kitabu Nin Kəndə

Kitabu *nin* ye bataki le ri men farani Yakuba la. A ka *nin* sebe Yahudiya lemeniyamooilu le ma men ye jensenni jamana gbereilu kəndə ləndanya la. Waati wo la, lemeniyamooilu tere ye toroya rə. Hali jamana nəmoɔilu tere ye ie tərəla. Alla la Nin Senaman jiira Yakuba ma, a ka kuma *nin* dafə damira a ni ka a sebe, ka lemeniyamooilu fanka don sila men ye tuja ri, ka wa Alla ma.

Kitabu *nin* ye lalili siyaman de dila lemeniyamooilu ma. A ye an karanna Alla too fo nala an dagbolo la a ni ka Alla sariyailu bonya, wo ye ko fila le ri men te kelen di. Lemeniya ti foyi ri ni i ma Alla la sariya sila latelen. Kitabu *nin* ye jusukolo le karanna a ni ka sila nūma laka an nəən fe. A ti se farala.

Kitabu *nin* ye məə lalila na gberə ma men ye an jusukolo lola sila bərə mira la. An ma kan ka məə bə məə rə. A ye an majininkala ka an ye an nəən demen, an ye an nəən bonya, an ye diya an nəən yε. A ye an majininkala an ye an nənkun mira, ka kumaba fsto ye. An ye an mujun an na torøyailu ma. An kana ke məə mənəma ri. An kana dunuŋa nata diya an yε. An ye an karifa Alla la, an na ko bəε rə.

Alla ye an bəε demen an ye a la sariya bəε latelen ikomin a ka kan ka ke na men ma. Allama wo kera. Amina.

Yakuba la foli rə

¹ S_eb_e jin farani Yakuba le la, m_en ye Alla la j_on de a ni Maari Isa m_en Nenemata_monin na j_on de ri. N ye a lawala *Isirayeli la kabilia tan ni fila ma, m_enili j_ensenni dunuja fan b_ee r_o. N ye ai tuwala.

Alu ye sewa t_or_oya r_o

² N badenmailu, t_or_oya su su wa ai s_or_on, ai ye wo mira ka a k_e ai sewa ko ba ri, ³ baa ai ka a l_on ko ai la lem_eniya wa k_or_ob_o, wo ri k_e sababu ri do ri la ai la mujunnin kan. ⁴ Ai ye t_or_oya b_ee mujun foo ka a ban, sa ai ri k_e m_o dafaninilu ri fewu. Foyi t_e ai j_en butun. ⁵ K_oni ni famunyali ka ai do j_en, a ye Alla matara. Wo ri famunyali di a ma, baa Alla ye m_o b_ee s_ola ka a wasa. A t_e alu jalakila fo ka alu s_o. ⁶ K_oni m_o wo wa Alla tara, fo a ye ala lem_eniya la Alla r_o, a kana sika. M_o m_en ye sikasikala, wo tii ye ikomin k_ooji jikuru ba, f_oj_o ye m_en namaala kojuuya. ⁷ Wo tii kana a miri ko a ri fen s_or_on Maari bolo. ⁸ Filankafu le. A t_e tola kan kelen si kan ala ko si r_o.

Fantan ni nanfulutii

⁹ Lem_eniyam_o m_en ye fantan di, wo ka kan ka waso bake, baa a ka bonya s_or_on Alla la. ¹⁰ M_en ye nanfulutii ri, wo fanan ka kan ka waso bake, baa a ka dooya s_or_on. M_o wo ri sa ka wa ikomin bin fer_en ye jala ka wa ja m_en ma. ¹¹ Ni tele b_ora ka a wuy_e ba lab_o, bin di ja, a f_ere_e ilu b_ee ri tunun. A dariya b_ee ri ban fewu. Nanfulutii fanan bant_o ten de ka b_o ala ko ketailu tema.

Alla t_e m_o man_eenna

* **1:1** Kuma jin ma f_o ko m_o wo ye s_or_onna Isirayeli la kabilia tan ni fila kelen de ma, a f_anin dunuja m_o b_ee le y_e m_en lanin Maari Isa la.

¹² Kunnadiya məə men ye a mujunna ala tərəya rə, wo məə wa ban kərəbəla Alla bolo a ri nenemaya banbali sərən, Alla ka men lahidi ta a kanintemailu ye. ¹³ Kojuu ke loo wa məə mira a tərəya waati rə tuma men na, a kana a fə ko Alla le ye a maneeenna, baa kojuu ke loo te Alla mirala. Alla fanan te məə si maneeenna ten. ¹⁴ Məə bəe ye maneeenna a jere la nata juu la ka a mira ikomin miralifen. ¹⁵ Kojuu loo wa an mira tuma men na a ri an ke kojuu kəla ri, a ni kojuu wa fanka sərən tuma men na, a ri an faa.

¹⁶ Nba, n kaninbailu, ai kana sən ai ye lafili. ¹⁷ Məə ri fen jnuma menilu sərən, a ni fen dafanilu, woilu bəe ye bəla Alla fe san ma, men ka san də kenəbəlanilu dan. A te yeləmanna ka bə a ja ma. Dibi yərə si te a la. ¹⁸ A ka jenemaya kura lateə ka a di an ma ka fara ala kuma la, men ye tuja ri. A ka wo ke, sa a ri lədiya fələ di an ma ala danninfenilu bəe temə.

Fo ka Alla la kuma labato

¹⁹ Ai ye hankili bila jn̄in də, n kaninbailu, ai ka kan ka kaliya ka ai tolo malə ai jn̄ən na, ai kana da lakaliya kuma fəla, ai kana mənə jona. ²⁰ Baa məə wa mənə, a ti se telenbaya koilu kəla. ²¹ Wo le kosən, ai ye kənərəjuuya bəe to ye, ka kojuu bəe boloka. Ai ye ai fanmajii ka sən Alla la kuma ma, a ka men don ai jusukun də. Kuma wo le ri se ka ai kisi.

²² Ai ye ai tolo malə Alla la kuma la ka a labato. Ai kana dan ai tolo maləla a la. Ni wo te, ai ri ai jere lafili. ²³ Baa ni məə ka a tolo malə kuma wo la, kəni a ma sən wo labatola, a ye ikomin məə men ye a jere jn̄akərə ragbela dubalen na kosebə. ²⁴ A wa ban

a jakɔrɔ ragbela ka wa, a jakɔrɔ ye ja mɛn ma, a ri jina wo ko i kɔrɔ. ²⁵ Sariya dafanin di se mɔɔilu hɔrɔyalala. Mɔɔ mɛn wa a raja a karanna tuma bɛɛ, Alla ri wo tii kunnadiya ala ko kɛtailu rɔ. Wo ye mɔɔ le ri, mɛn ye kuma wo labatola. A te sɔn ka a tolo malɔ a la gbansan.

²⁶ Ni mɔɔ ye a mirila ko a ye Alla la dina rɔ, ka a tɛren a ti se a nɛn kun marala, wo tii ye a jɛrɛ lafilila. A ye mɛnilu jatela Alla la dina ri, woilu tɛ foyi ri. ²⁷ Ka faratanilu ni cɛsamusoilu dɛmɛn alu la tɔrɔya waati, a ni ka an jɛrɛ mabɔ dunuŋa ko nɔɔilu bɛɛ la, wo ye Alla la dina sɛnimana ba le ri an Fa Alla jakɔrɔ.

2

Alu kana mɔɔ do lafisaya mɔɔ do ma

¹ Nba, n badenmailu, ai ra lemɛniya an na Maari Isa mɛn Nenematomɛnin ma, gbiliya ba ye mɛn bolo, wo rɔ ai kana mɔɔ do lafisaya mɔɔ do ma. ² N di misaliya di ai ma. Ni lon do rɔ, mɔɔ do ri na don ai kan ai la ladɛn diya, koyina saninnaman ye a bolo la, faanin jnuma ye a kan na, a ni wo waati kelen, fantan do fanan di don ai kan, faanin koron ye a kan na, ³ tumadɔ ai ri ja bɔ faaninpumattii wo la, ka a bonya, ka a fɔ a yɛ ko a ye na a sii siifen jnuma rɔ yan, kɔni ai ri a fɔ fantan yɛ ko a ye a lɔ wo ri, ni wo tɛ, ai ri a fɔ a yɛ ko a ye a sii duu ma ai sen kɔrɔ. ⁴ A ye di wo rɔ? Ni ai ka a kɛ ten, ai ma mɔɔ do lafisaya do ri ai tɛma wa? Ai ma na kɛ miriyajuutii ri ai la kititeɛ diya rɔ wa?

⁵ N badenma kaninbailu, ai tolo malɔ. Dunuŋa mɔɔilu ye mɛnilu jatela fantanilu ri, Alla le ka

woilu suwandi sa alu ri leməniya kosebe. Alla ka alu suwandi fanan, sa alu ri se donna ala mansaya rɔ, a ka mən lahidi ta a kanintemailu yε. ⁶ Kəni ai ye fantanilu dooyala! Nanfulutiilu le tε ai mirala karagbəleya la wa? Alu le tε ai mirala ka wa ai ri kititee diya rɔ wa? ⁷ Ai ye mən ta ri, nanfulutii le tε wo tanama kuma fɔ wa?

⁸ A səbeni Alla la kitabu kəndə ko: «I ye i sijəən kanin ikomin i ye i jεrε kaninna ja mən ma.» Alla la mansaya sariya le wo ri. Ni ai ka sariya wo labato, ai ye kojuma kəla. ⁹ Kəni ni ai ka mɔɔ bɔ mɔɔ rɔ, ai ra kojuu kε. Sariya ye a yirakala ko ai ye sariya tijanbailu le ri wo rɔ. ¹⁰ Ni mɔɔ ka sariya kelen pe tijan ka a tɔilu bεe latelen, a ye ikomin wo tii ra sariya bεe tijan. ¹¹ Baa Alla kan ko: «I kana kaninkε kε.» A kan fanan ko: «I kana mɔɔ faa.» Awa, ni mɔɔ ka mɔɔ faa, wo tii ra kε sariya tijanbari, hali ni a ma kaninkε kε. ¹² Alla ri ai la kititee ka a bən sariya le ma, sariya mən ye mɔɔ hɔrɔyala. Wo le kosən, ai ye ai kuma ni ai taama bεe kε ka a bən miriya wo ma. ¹³ Hina ri se kititee ma.

Leməniyaməəilu ka kan ka kewalijnumailu kε

¹⁴ Nba, n badenmailu, ni mɔɔ do ka fɔ ko leməniya ye a bolo, ka a tεrən a tε kewalijnumailu kəla, a ye di wo rɔ? A tii ri se kisila wa? ¹⁵ Ni ai badenmace wala ai badenmamuso mako ye feriyabɔ ni balo la don? ¹⁶ Tumadə ai do ri a fɔ makotii wo yε ko, «Alla ye hεrε kε i yε, ko i ye wa i maja, ka damunun kε ka i fa,» kəni ni a ka wo le fɔ ka a tεrən a ma fosi di a ma ka a mako ja, wo ye nfen de ja? ¹⁷ Wo ja kelen de ma, ni mɔɔ do kan ko a leməniyani, ka a tεrən a tε kewalijnumailu kəla,

wo tii la leməniya tε foyiŋala a ma. A ye ikomin fen faanin de.

18 Tumadɔ do ri a fɔ ko: «Leməniya ye i bolo, kɔni nde ye kewalijnumailu kɛla.» Nba, ile mɛn tε kewalijnumailu kɛla, i ye i la leməniya yiraka n na ni kewalijnumailu tε. Nde fanan di n na leməniya yiraka i la n na kewalijnumailu sababu la. **19** I lani a la ko Alla kelen pe le ye ye. Wo ka jni! Hali jinailu lani wo la. Woilu silanni Alla yε foo ka alu yereyere. **20** Mɔɔkuntan! I ye a fε n ye a yiraka i la wa ko leməniya tε foyiŋala ni a ma mɔɔ lɔ kewalijnumailu kɛla? **21** Alla ma an benba Iburahima jate mɔɔ telenni ri ala kewalijnumailu le kosɔn wa? Baa a ka a dence Isiyaka la sarakadiya kan ka a kε Alla la sarakafen di. **22** I ka a jnayen wa? A lemeniyara Alla ma ka kewalilu kε. A ka kewali mɛnilu kε, woilu le ka ala leməniya dafa. **23** Wo le rɔ, men sɛbəni Alla la kitabu kɔndɔ, wo dafanin. A sɛbəni ko: «Iburahima lara Alla la kuma la. Wo rɔ, Alla ka a jate mɔɔ telennin di.» Ka a la wo kan, Alla ka Iburahima kili ko a terice. **24** Ai ka a jnayen wo rɔ ko Alla ri mɔɔ jate mɔɔ telennin di a tii la kewalilu kosɔn, leməniya ko gbansan tε.

25 Wo ja kelen de ma, Alla ka sunkurunba muso Rahabu jate mɔɔ telennin di ala kewalijnumailu le kosɔn. Baa Isirayεlikā cε fila mɛnilu wara jamana lakɔrɔsi, Rahabu ka woilu ramira kojuma a wara, ka ban ka alu dɛmɛn sila gbere sɔrɔnna ka wa. **26** Nba, ni nin tε mɔɔ men faribanku rɔ, mɔɔ wo sanin de. Wo ja kelen de ma, ni mɔɔ do kan ko a leməniyan, ka a tɛren a tε kewalijnumailu kɛla, wo tii la leməniya ye ikomin fen faanin de.

3

Fanka ye mao nen na

¹ N badenmailu, ai siyaman ma kan ka ke karanmooilu ri, baa ai ka a lon ko andeiliu menilu ye maoilu karanna, an na kiti ri gbelya ka tamin mao tɔilu ta la. ² An bee ye filila ja siyaman de ma. Ni mao men te filila a kuma rɔ fewu, wo tii ye mao dafanin de ri. A ye senjerele mao le ri. ³ An wa karafe don so da rɔ sa a ri wa an sawonan diya rɔ, so la ko bee ri ke andeiliu le bolo. ⁴ Ai ye jikan kulunbailu mafene. Alu ka bon kosebe. Fɔŋɔ ba wa tɛe, a ri alu ta ka wa alu ri. Koni kulun borilan fitini do ye alu la, men ye alu lawala kulunborila sawonan diya bee rɔ. ⁵ Wo ja kelen de ma, nen ye mao faribanku fen fitini do le ri. Koni a ye waso ko bailu fɔla.

A ragba! Ta fitina ri se tu ba mirala ka wo bee janin. ⁶ Mao nen fanan ye ikomin ta. Foyi te a la ni kojuu gbansan te! A ye mao faribanku yɔrɔ do le ri, men di mao faribanku yɔrɔ tɔilu bee lanoo. A ye ikomin jahanama ta le ye a rɔ. A ri se mao la dunujaratee bee ratijanna. ⁷ Adamaden ye nimafen su bee kolola: waa rɔ soboilu wo, kənɔilu wo, ji rɔ fenilu wo, nimafen misenilu wo, menilu ye taamala duu ma. Adamaden da wo bee kolo, ⁸ koni mao si ti se a nen kolola! Fen juu le. Mao ti se a la. A keni ikomin a lafani baa le la. ⁹ Maari men ye an fa Alla ri, an ye wo tandola an nen de la, koni Alla ka mao menilu dan ka alu ke a jere munuja ri, an ye woilu dankala nen kelen wo le la. ¹⁰ Da kelen de ri duwawu ke a ri dankali fanan ke! N badenmailu, wo ma kan ka ke de! ¹¹ A ye di? Ji duman ni ji kunani fila bee ri se bɔla ji bɔ diya kelen

dɔ wa? ¹² A ye di, n badenmailu? Toroju ri se a denna olibiyedenilu la wa? Resenju ri se a denna torodenilu la wa? Wo kuma tε! Nba, ji duman tεna bɔla ji bu yɔrɔ rɔ, kɔɔji ye bɔla mɛn dɔ.

Famunyali mɛn bɔni Alla rɔ

¹³ Nba, mɔɔ ye ai tεma wa, mɛn ye mɔɔ famunyali hankilima ri? Ni do ye ye, wo tii ye ala famunyali yiraka ala taama jnuma rɔ, a ni ala kewalilu rɔ, a ye mɛnilu kɛla fanmajii mɛn bɔni famunyali rɔ. ¹⁴ Kɔni ni keleya ye ai la kojuuya, a ni bɛnsenkolontεya, ai kana ai jere bonya ko ai ye mɔɔ famunyanilu le ri. Ni wo tε, ai ri wuya fɔ ka tuŋa tijan. ¹⁵ Famunyali su wo ma bɔ Alla rɔ sankolo rɔ. A bɔni dunuja le rɔ yan, a ni adamaden ni jina le rɔ. ¹⁶ Baa keleya ni bɛnsenkolontεya ye yɔrɔ mɛn dɔ, sɔsɔli fanan ka siya ye, a ni kewaliju su bεe. ¹⁷ Kɔni famunyali mɛn bɔni Alla rɔ sankolo rɔ, wo fɔlɔ ye a tii kɛla mɔɔ sɛniman de ri, jesusuma duman mɛn yε. Wo tii ye mɔɔ sabarini de ri, mɛn na ko ma gbelen. Wo ye hinala mɔɔilu la kosebɛ ka kojumailu ke alu yε. A tε mɔɔ bɔla mɔɔ rɔ. Filankafuya tε ala ko rɔ.

¹⁸ Mɔɔ mɛn ye jesusuma baara kɛla mɔɔilu tɛma wo la dunujarateε ri ke telenbayra ri.

4

Ai ye ai madon Alla la

¹ Nba, kɛle ni sɔsɔli mɛnilu ye ai ni i jnɔɔn tε, woilu bɔni mi? Alu ma bɔ ai la nata juuili le rɔ wa, mɛnilu ye kɛle kɛla ai la jnenemaya rɔ tuma bεe?
² Fen loo ye ai la, kɔni ai tε a sɔrɔnna. Wo rɔ, mɔɔ faa loo ye ai mirala. Ai nata lani fen do kan, kɔni ai

ti se wo sɔrɔnna. Wo rɔ, ai ye i nɔɔn sɔsɔli, ka i nɔɔn kɛlɛ. Ai ye mɛn fɛ, wo tɛ ai bolo, baa ai tɛ a tarala Alla la. ³ Ni wo tɛ, ai wa a tara, ai tɛ fen sɔrɔnna, baa ai ye a tarala miriyajuuya le la. Ai ye a tarala ai jɛrɛ la nata juu ilu le nafa kanma. ⁴ Ai ye ikomin kaninkɛlailu! Dunuja koilu duman mɛn yɛ, Alla la ko ma di wo tii yɛ. Ai ma wo lɔn wa? Nba, mɔɔ mɛn ye a fɛ ka kɛ dunuja koilu kaninba ri, wo tii ye a jɛrɛ kɛla Alla juu le ri. ⁵ Mɛn fɔni Alla la kitabu kɔndɔ, ai ye ai mirila le ko wo fɔni le fuu wa? A kan ko: «Alla ka nin mɛn bila an dɔ, wo duman a yɛ a ja jɛrɛ jɛrɛ ma.»

⁶ Kɔni Alla ka baraka don an na ko rɔ haan ka tamin. Wo le kosɔn, a fɔni Alla la kitabu kɔndɔ ko: «Alla ye jɛrɛdabailu kɛlɛla.

Kɔni a ye baraka donna mɔɔ fanmajiinilu rɔ.»

⁷ Wo le rɔ, ai ye ai fanmajii Alla yɛ ka a kan mira. Ai ye ai ban Setana rɔ. Wo rɔ, a ri a bori ka a mabɔ ai la. ⁸ Ai ye ai madon Alla la. Wo rɔ, Alla fanan di a madon ai la. Ai kojuukɛlailu, ai ye ai bolo bɔ kojuu la fewu. Ai filankafuili, ai ye ai jusukun səniya. ⁹ Ai ye jusumakasa, ka kasi, ka kule! Ai ye yɛlɛ boloka ka a kɛ kasi ri. Ai ye sewa boloka, ka a kɛ jusukasi ri. ¹⁰ Ai ye ai fanmajii Maari jnako rɔ. Wo rɔ, a ri ai kun nawuli.

Leməniyamɔɔilu kana i nɔɔn mafɔ

¹¹ Nba, n badenmailu, ai kana i nɔɔn tɔɔjuu fɔ. Mɔɔ mɛn wa a badenma tɔɔjuu fɔ, ka a badenma jii kojuukela ri, wo tii ye Alla la sariya le tɔɔjuu fɔla, ka sariya wo jii fen juu ri. Ni mɔɔ don ka sariya jii fen juu ri, wo tii tɛ sariya labatola fo ka a jɛrɛ kɛ sariya jalakiba ri. ¹² A kelen pe le ye sariyasiiba ri.

A kelen pe le ye kititeεla ri. Ale le seni mɔɔ kisila, a seni mɔɔ halakila fanan. Kəni ai mɔɔ gbansan, nfenna ai ye ai mɔɔjøən jii kojuukela ri?

Lemeniyamɔɔilu kana alu jerεdabaya

¹³ Nba, ai ye ai tolo malɔ sisen. Ai kan ko: «An di wa so do kəndə bi, ni wo te sini. An di san kelen ke ye, ka julaya ke ka tənə sərən.» ¹⁴ Ai kan ten, kəni ai ma wo lɔn men di ke sini. A ye di? Aila dununjarateε ye nfen di? Ai ye ikomin duuru, men di bɔ ka waatini ke, ka ban ka tunun. ¹⁵ Ai ka kan de ka a fɔ ko: «Ni Maari sənda, an kənde ri to, an di ko jinilu ke.» ¹⁶ Kəni sisen, ai ye ai wasola ka jerεrabaya kumailu fɔ. Wo jøən bεε ma ji le! ¹⁷ Wo rɔ, ni mɔɔ men ka a lɔn a ka kan ka kojuma men ke, kəni a ma wo ke, wo tii ra julumun ke.

5

Nanfulutii janinkεjuuili

¹ Nba ai nanfulutii, ai ye ai tolo malɔ! Ai ye kasi ka kule, baa tɔrɔya ri na ai sərən. ² Aila nanfulu ra tijnan. Baabaanen da don ai la faaninilu rɔ. ³ Korikori ra ai la sanin ni ai la wodigbε mira. Korikori wo ri ai jalaki. A ri ai fari halaki ikomin ta. Ai ra nanfulu ladɛn ai jere ye dunuja laban waati jin dɔ. ⁴ Ai ja lo! Baaraden menilu ka ai la senesumanilu ka, ai ka woilu janfa. Ai ma sɔn alu sara dila alu ma. Sara wo ye kulekan bɔla ai kanma. Baaradenilu kulekan ra se Maari Sebεetii ma. ⁵ Ai ka ai la dununjarateε ke fen duman gbansan de kan, ka ai diyana koilu gbansan de ke. Ai ra ai jere ke ikomin nisi tɔlɔnilu, menilu ye alu

kannat^{ee} lon mak^{ənəla}. ⁶ Ai ra kiti labe m^{əo} telenni kan ka a faa, m^{en} t^e ai s^{əsəli}.

Lemeniyam^əilu ye alu mujun

⁷ Wo le r^ə, n badenmailu, ai ye ai mujun foo Maari ye na. Ai ma s^{enekelailu} k^{ərəsi} wa? Alu ye suman ka mak^{ənəla}, alu ri m^{en} s^{ərən} alu la s^{en} r^ə. Alu ri alu mujun foo sanci ye na, sanci f^{ələ} ni sanci laban. ⁸ Ai fanan ye ai mujun, ka jusu lasewa, baa Maari na lon da sudunya.

⁹ N badenmailu, ai kana ai makasi ai j^{əo}n kan, sa Alla kana kiti labe ai kan. Kititeela le a ri, m^{en} ma jan aila. A ri na i t^{rəfə} sisen. ¹⁰ N badenmailu, ai ye ai hankili to Maari la nabijumailu la kuma r^ə, menilu kumara a t^{əo} r^ə. Woilu ka alu mujun i t^{rəya} k^{ərəna} m^{en} ma, ai ye ai mujun ja wo le ma. ¹¹ Ai ja l^ə! M^{əo} menilu ka alu mujun t^{rəya} r^ə, an ye a f^{əla} ko wo tii kunnadiyani Alla bolo. Ayuba ka a mujun ja m^{en} ma, ai ka wo m^{en}. Maari ka m^{en} ke a y^ε a laban d^ə, ai ka wo fanan l^{ən}, baa Maari la kininkinin ka bon, a ni ala kaninteya.

¹² Nba, n badenmailu, n ye m^{en} magb^{əleyala} ai y^ε, wo le jin: ai kana ai kali. J^{ən}, ai kana ai kali sankolo la, wala duukolo la. Ai kana ai kali foyi la. Ni ai s^{ənda} ko ma, ai ye a f^ə d^{ərən} ko ɔ^{ən}. Ni ai ma s^{ən} ko ma, ai ye a f^ə d^{ərən} ko ε^{ən}. Ai ye dan wo ma, sa kiti kana be ai kan.

Fanka ye Alla tara r^ə

¹³ Nba, ni t^{rəbatə} ye ai t^{əma}, wo ye Alla tara. Ni m^{əo} sewanin ye ye, wo ye kaliman b^ə Alla y^ε ka a tando. ¹⁴ Ni jankar^{əto} ye alu r^ə, wo ye lemeniyam^əilu la dekuru j^{əm^əilu} kili. Alu ye tulu ke a kun na Maari t^{əo} r^ə, ka Alla tara

a yε. ¹⁵ Ni mɔ̄o ka ala lemεniya la Alla rɔ̄ ka a matara, jankarɔ̄to ri kεndεya. Maari ri a lawuli. Ni jankarɔ̄to tun ka kojuu le kε, Maari ri woilu yafa a ma. ¹⁶ Wo le rɔ̄, ai ra kojuu mεnilu kε, alu ye woilu fɔ̄ i nɔ̄en yε, ka Alla tara ai nɔ̄en yε, sa ai ri kεndεya. Fanka ye telenba la tarali la a ye ko nala kosebε.

¹⁷ Nabi Eli fanan tεrε adamaden de ri ikomin andeilu, kɔ̄ni a ka a raja Alla matarala ko sanci kana na. Wo rɔ̄, sanci ma na san sawa ni karo wɔ̄orɔ̄ kɔ̄rɔ̄. ¹⁸ Wo taminni kɔ̄rɔ̄, a ka Alla tara ikɔ̄ ko sanci ye na. Sanci nara. Duukolo jiri ni a sumanilu ka alu den.

¹⁹ N badenmailu, tumado ai do ri fili ka tuŋa sila bila, kɔ̄ni lemεniyamɔ̄o do ri wo tii laseyi ka a bila tuŋa sila kan ikɔ̄. ²⁰ Ni wo kεra, ai ye la a la ko mɔ̄o mεn ka kojuukεla labɔ̄ ala fili sila kan, wo tii ra kojuukεla ni kisi saya ma. A fanan di kε sababu ri, Alla ri kojuu siyaman ba yafa kojuukεla wo ma.

**Alla la Kitabu Seniman
Portions of the Holy Bible in the Sankaran Maninka
language of Guinea
Des portions de la Sainte Bible dans la langue
Sankaran Maninka de Guinée**

copyright © 2015 Pioneer Bible Translators

Language: Sankaran Maninka

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source files
dated 29 Jan 2022

bb49d365-c43a-57d0-a386-570745648030